

Inatsisissamut oqaaseqaatit

Oqaaseqaatit nalinginnaasut

1. Inatsisissatut siunnersuutip tunuliaqutaa

Biilinit akitsuutip allanngortinneqarnissaa pillugu Inatsisartut UKA 2009/23-mi aalajangiiffigisassatut siunnersuut oqaluuseraat, imaalillugu, biilit uulia tunngavigalugu atuinngitsut, ukiuni sisamani misileraaffiusumi akitsuutitaqanngitsumik eqqunneqarsinnaanngorlugit. Siunnersuuteqartup kissaatigaa Kalaallit Nunaanni CO₂-mik aniatitsinerup annikillisinneqarnissaa, tamannalu biilit uulia tunngavigalugu atuinngitsut ikililernerisigut anguneqarsinnaavoq.

Aalajangiiffigisassatut siunnersuut Inatsisartunit tamarmiusunit isumaqatigineqarpoq.

Akilerartarnermut Akitsuusiisarnermullu Ataatsimiititaliap isumaliutissiissutaani isumaliutigineqarpoq, biilit ingerlatit akuleriisillugit ingerlasinnaasut, akitsuutitaqanngitsumik eqqunneqarsinnaasunut ilanngunneqassanersut, aamma qamutit motorillit akileraarutaannik akiliisannginnissaq ilanngullugu, biilimmi innaallagissamik ingerlatillit oqimaannerusarmata, ullumikkut alajangersakkat oqimaassutsit tunngavigalugit akitsuusersuisoqartarmat taakkununga malittarisassat naleqqutinngimmata.

Biilit innaallagissamik nalinginnaasumillu ingerlatillit eqqarsaatigalugit Naalakkersuisut isumaqarput inatsisissami ilaatinneqassanngitsut. Tassunga peqqutaavoq biilit innaallagissamik nalinginnaasumillu ingerlatillit periarfissaqarmata uuliamik aallaaveqartumik (soorlu aammarsuarnik, uuliamik, issumik gassimillu) ingerlaserneqarsinnaaneri. Biilit taamatut ingerlateqarsinnaasut akitsuuserneqannginnissaannut tunngavissat suut aallaavigineqassanersut aalajangiiffigisallugu ajornakusoorpoq. Assersuutigalugu piumasaqaataassavaa biilit orsussaasivia 5 liiteriinnarmik imaqarsinnaassasoq? Imaluunniit batteerit iluaqtsiullugit minnerpaamik 100 km-it ingerlasinnaasuussappaat? Piumasaqaatit qanorluunniit issagaluarpata biilit sunik ingerlateqarneri nakkutigiuminaatsuusaaq. Taamaammat qularnaarneqarsinnaanngilaq biilit taamaallaat innaallagissamik ingerlateqarnerisa nakkutigineqarnissaat, taamaammat avatangiisinut sunniutigisinnaasai nalileruminaassalluni.

Piffissami misileraaffiusumi Naalackersuisut biilit misilerarneri malinnaaffigissavaat, misileraaneq naammassippat Inatsisartut naliliinissaannut toqqammavissaqarsinnaaqullugit.

Malugeqquneqassaaq biilit innaallagissamik brintimillu ingerlatillit suliffeqarfimmit biileritinneqartut, Aningaasarsianit akileraarutit pillugit Inatsisartut inatsisaat naapertorlugu akileraartinneqartassammata.

2. Inatsisissatut siunnersuutip imaa

Inatsisartut inatsisaat naapertorlugu, biilit innaallagissamik brintimillu ingerlatillit ukiuni sisamangajanni misileraanerup ingerlanerani eqqunneqarnerini akitsuuserneqassanngillat qamutit motorillillu akileraarutaannik akiliisinneqassanatik.

3. Aningaasatigut allaffissornikkullu pisortanut sunniutigisinnaasai

Maannakkorpiaq biilnik innaallagissamik ingerlatilinnik, aammalu brintimik ingerlatilinnik amerlasoorsuannorlugit sanaartortoqarnissaanut sulii pilersaarutini takussaasoqanngimmat, nunatsinnilu pinngortitap pissusaanut naleqqussagaaneri nalunarmata misileraanerup ingerlanerani ilimagisariaqarpoq eqqunneqarnerini akitsuutiniq qamutit motorillillu akileraarutaannit iluanaarutiniq annaasaqarnissaq annikitsuinnaassasoq. Aningaasatigut sunniutissaa naatsorsuutigineqarpoq 500.000 kr.-it inorlugit ajunaarutaassasoq.

Eqqunneqarnerini, qamutit motorillillu akileraarutaannik allaffissornikkullu annikitsuinnarmik sunniuteqassaaq.

Misileraanermi biilit innaallagissamik ingerlatillit orsersorneranni avatangiisinut sunniutigisinnaasaat malittarineqassapput, soorlu batterit immernerini erngup nukinga imaluunniit uuliamik ikummatilinnit batterit innaallagissamik immerneqarnerisut malinnaavigineqassallutik.

Naalackersuisut ilisimatitsissutigissavaat siunnersuummi uani akitsuutissat Akileraartarnermut Atugarissaarnissamullu Isumalioqatigiissitap suliaasa ilagimassuk.

4. Suliffiutilinnut aningaasaqarnikkut allaffissornikkullu sunniutigisinnaasai

Suliffiutilinnut biilnik innaallagissamik brintimillu ingerlatilinnik pisinermikkut batterit innaallagissamik immersinnerini benzinamut dieselimulluunniit akiliutissaralutik biilit innaallagialersornerannut brintilersornerannullu atortalissavaat. Aningaasartuutit tamakku ingerlatsinermi aningaasartuutit nalilerneqassapput, taakkulu aningaasarsianit akileraaruteqaataasussatut ilanngaatigineqarsinnaasutut nalunaarutigineqartassapput. Suliffeqarfiutilinnut biilnik

innaallagissamik brintimillu ingerlatilinnik pisinermikkut eqqussinermi akitsuut sipaassavaat, soorlulu ukiup affakkaartumik qamutit motorillit akileraarutaat misileraanerup nalaani sipaassallugu.

5. Avatangiisinut pinngortitamullu sunniutigisinnaasai

Illoqarfinni erngup nukiliorfeqarfiusuni siunnersuut iluaqutaassaaq. Illoqarfinni uuliamik nukissiorfeqartuni kingunerisinnaasai nalorninartortaqrput. Misileraanerulli ingerlanerani nalilersuinerit kingunerisinnaasai paasinarsissapput.

6. Allaffissornikkut innuttaasunut kingunerisinnaasai

Allaffissornikkut innuttaasunut inatsisissatut siunnersuut sunniuteqassanngilaq.

7. Naalagaaffeqatigiinnermut Namminersorluni Oqartussanullu kingunerisinnaasai

Inatsisissatut siunnersuut naalagaaffeqatigiinnermut sunniuteqassanngilaq.

8. Oqartussanik kattuffinnillu tusarniaanerit

Siunnersuut ukunani tusarniaassutigineqarpoq:

Grønlands Arbejdsgiverforening, NUSUKA, Ineqarnermut, Attaveqarnermut Angallanermullu Naalakkersuisoqarfik, Inuussutissarsiordermut Suliffeqarnermullu Naalakkersuisoqarfik, KANUKOKA, Nunamut namminermut Pinngortitamut Avatangiisinullu Naalakkersuisoqarfik, Nukissiorfiit aamma Nuup Bussii A/S.

Tusarniaanermi akissuteqartut tulleriiaarneri oqaaseqaatillu:

Aningaasaqarnermut Naalakkersuisoqarfimmit paasissutissiissutigeqquneqarpoq akitsuutit atorunnaarsinneranni iluanaarutissaagaluit 500.000 kr.-t inutsiarlugit annaasaqaataanissaanni naatsorsuineq suna tunngavigalugu nassaarinqarsimanersoq. Eqqoriaanerinnaavoq, ilisimaneqanngimmammi biilitt innaallagissamik ingerlatillit qanoq amerlatigisut pineqarnersut. Nukissiorfiit akissuteqarnerminni naatsorsuutiginerarpaat biilit innaallagissamik ingerlatilinnik sanaartortut 2012-imiit tuniniaalernissaat ilimaginerarlugu. Taamanikkornissaata tungaanut misiligutitut arlaqanngitsuinnaat atorineqassapput. Biilinnik innaallagissamik ingerlatilinnik pisisussat issittumi atorineqarsinnaanerisa misilerarneqarnerat utaqqimaassagunarpaat, apeqqutaatilluguttaaq angallassissutit innaallagissamik ingerlatillit amerlasuunngorlugit sanaartorneqarneranni akigititaasoq qanoq annertutigissanersoq.

Qamutit motorillit ukiumut akileraarutaat maanna atuuttut Naalackersuisut erseqqissaassutigaat:

Qamutit 900 kg.-t tikillugit oqimaassusillit:	5.958 kr.
Qamutit 901-1.500 kg.-t tikillugit oqimaassusillit	8.374 kr.
Qamutit 1.500 kg-t sinnerlugit oqimaassusillit	10.950 kr.

Eqqunneqarneranni akitsuut biilit akii apeqqutaatillugit annertussuseqarput.

Inunnik angallassissutit: Aalajangersimasumik 50.000 kr.-nik akitsuuserneqassapput, pisinermilu akigititat 50.000 kr.-nik, 150.000 kr.-lli inorlugit akeqarpata 100 %-mik ilaneqartarpoq, sinnerilu 125 %-imik akitsuuteqarput.

Biilit usisaatit 4 tons inorlugit oqimaassusillit: Aalajangersimasumik akitsuutigittinneqarpoq 50.000 kr. pisinermilu akigititaaq 50.000 kr.-t sinnerpagit 50 %-ianik akitsuuserneqartarput.

Usisaatit, bussit, angallassissutillu 4 tons sinnerlugit oqimaassusillit: 50.000 kr.

Biilit innaallagissamik ingerlatillit misilerarnerat Naalackersuisut malinnaaffigissavaat.

Ineqarnermut, Attaveqarnermut Angallanermullu Naalackersuisoqarfiup qamutit brintimik innaallagissamillu ingerlatillit akitsuuserneqannginnissaat tapersorsorpaat, biilit ingerlatit assigiinngitsut atorlugit ingerlasinnaasut inatsisissatut siunnersuummi ilanngunneqannginnissaat isumaqatigalugu. Naalackersuisoqarfiup nunaqarfinni ikittuni naammattumik innaallagiaqartannginnissaa malugeqqaa. Tamannali annerusumik ajornartorsiutaassanngilaq, biilimmi innaallagissamik ingerlatillit amerlanersaat illoqarfinni innaallagissamik amikkisaarfiunngitsuni pisiarineqarsinnaalernissaat qularnanngimmat.

Naalackersuisoqarfiup § 1-ip paatsoorneqarsinnaanera uparuarpa, tassami ingerlatissamik innaallagissiornermi CO-2-mik mingutsitsisoqannginnissaa pineqarmat, biilit ingerlatissaannik brintiliornerup qanoq ingerlanneqarnera apeqqutaatillugu akitsuut atortinneqartannginnissaa pingaartinneqarluni.

Paatsoorneqarsinnaasumik inatsisiliornissaq Naalackersuisut siunertarinngilaat, § 1-imilu oqaaseqaatit matumuunakkut iluarsiiisuteqarfigalugit.

Nunamut namminermut, Pinngortitamut Avatangiisinullu Naalackersuisoqarfik oqaaseqaateqanngillat, siunnersuullu tamakkiisumik taperserlugu, Kalaallimmi

Nunaanni CO2-mik mingutsitsineq, nalinginnaasumillu silaannaap mingutsinneqarnera taamaalilluni annikillisinneqarsinnaammat.

KANUKOKA kommunillu

Oqaaseqaateqanngillat.

Grunlands Arbejdsgiverforening Biilit uulia tunngavigalugu ingerlateqanngitsut eqqunneqarneranni, qamutit motorillit akileraarutaannut akiliinnginnissaq tamakkiisumik taperserpaat.

Taamaattorli qamutit uulia tunngaviginagu ingerlatillit akitsuuserneqartarnerat sukumiisumik misissullaquaa, Danmarkimisummi qamutit sungaartunik normu-pladillit akitsuutitaqannginnerat Kalaallit Nunaanni atuutinngimmat. Tamaammat qamutit usisaatillit Danmarkiminngarnit Kalaallit Nunaanni akisunerungaatsiarput. Siunnersuutigineqarpoq akitsuutaat peerneqassasut, Danmarkimisulluunniit normu-pladit sungaartut atortuulernissaat.

Peqatigiiffiup isumaa Naalakkersuisut maluginiarpaat.

Nukissiorfiit eqqarsaatigeqquaat biilit uulia tunngavigalugu kiassarneqartartut immikkoortittariaqartut. Malugeqquneqarpoq biilit paarlakkaallugit uuliamik, innaallagissamillu ingerlatillit 50 km-it inorlugit ingerlasussat innaallagiaannarmik ingerlasarnissaasa ajornaquteqannginnera. Ilisimatitsissutigaa 2012-imiit angallassissutinik innaallagissamik ingerlatilinnik sanaartortut nioqquteqalernissaat ilimagalugu. Taassuma tungaanut amerlanngitsuinnaat misileraatigineqassapput.

Nukissiorfiit oqaaseqaataat Naalakkersuisut maluginiarpaat, oqaaseqaatinilu erseqqissaatigalugulu biilit kiassarneqarneranni uuliap atorneqarsinnaanera.

Tusarniaanermi akissuteqaatit Akileraartarnermut Akitsuusiisarnermullu Ataatsimiititaliamut ingerlateqqinneqarput.

Aalajangersakkanut ataasiakkaanut oqaaseqaatit

§ 1-imut.

Aalajangersakkani naqissuserneqarpoq biilit taamaallaat innaallagissamik brintimillu ingerlatillit 1. januar 2014 tikillugu akitsuutitaqanngitsumik eqqunneqarsinnaassasut aammalu qamutit motorillit akileraarutaannik akiliisinneqartatik.

Aalajangersakkami taamaallaat pineqarput biilit innaallagissamik brintimillu ingerlatillit. Biilit in-naallagissamik ingerlatillit tassaapput batteri immeqqittagaq atorlugu ingerlatillit. Biilit brintimik ingerlatillit erngup silaannaallu iltip sananeqaataasa ataatsimoortillugit aggornerisigut. Taamaalil-luni brint CO2-mik akuerutissaaq.

Biilit ingerlatissamik allanik sunilluunniit taaneqartut saniatigut ingerlataasinnaasunik atortulerne-qassanngillat. Tamatumunnga siunertaavoq annikinnerusumik CO2-mik aniatitsinikinnerunissamik piffissami misileraavimmi misilittakkanik katersinissaaq, Akileraartarnermut Atugarissaarnissamullu Ataatsimiititaliamiit inassutinut ilassutissatut tapertaasalluni.

Malugineqassaaq biilit ingerlatissaat kisimik pineqarmata. Taamaasillunilu biilit kiassarneqarne-rinut ikummatissat uuliamik aallaaveqartut atorneqarnissaat ajornassanani.

§ 2-mut.

Siunnersuuteqartup Inatsisartut tapersersuisoralugit siunnersuutigaa misiliilluni ukiut sisamangajaat inatsit atuutsinneqassasoq.

Siunnersuutigineqarpoq inatsit 1. juni 2010 atortuulissasoq, atorunnaassasorlu 1. januar 2014-imi. Taamaalilluni siunnersuut malillugu misileraaneq ukiuni pingasuni qaammatinilu arfineq marlunni ingerlassaaq, aningaasaqarnermut inatsit malillugu ingerlasinnaaqullugu.

Misileraanerup atorunnaarnissaa sioqqullugu soorunami nalilersorneqassaaq inatsit atuutiinnassa-nersoq, allatigulluunniit akitsuusiisoqassanersoq.